

NURULISYAZILA
OTHAMAN

Negara sudah merdeka, jiwa kita bagaimana?

MERDEKA!
Merdeka!
Merdeka!
Itulah
laungan
keramat tanggal 31 Ogos 1957
yang tidak akan pernah hilang
dari ruang hati dan sanubari
kita semua.

Saban tahun laungan
tersebut akan terus
dilaungkan dengan penuh
semangat kemerdekaan,
yang bukan sahaja dihayati
meniti di bibir namun maksud
kemerdekaan itu mesti
dihayati dari dasarnya.

Generasi masa kini majoriti
berpendapat kemerdekaan
bermaksud negara yang
merdeka, bebas daripada
penjajah. Namun, adakah
kita semua faham apa erti
kemerdekaan yang sebenar?
Kemerdekaan yang dibawa
sejak zaman nenek moyang
kita.

Nenek moyang kita
merupakan golongan yang
lebih faham erti kemerdekaan
sebenar kerana mereka
merupakan pejuang yang
mengharungi jerih perih
kehidupan menentang
penjajah demi sebuah
kemerdekaan.

Golongan muda yang
tinggal kini perlu lebih
menghayati dan menyayangi
kedaulatan negara yang
merdeka. Pandang sahaja
negara luar yang sedang
bergolak mencari cahaya
kemerdekaan dan kebebasan
daripada peperangan serta
penderitaan taklukan
penjajah, sedangkan kita
yang sudah biasa hidup aman
damai belum tentu kuat untuk
berada dalam kasut mereka.

Generasi masa kini
meluahkan masa lebih
bersama gajet dan media
sosial. Ia merupakan kemajuan
teknologi yang perlu diterima
dan dimanfaatkan. Jika dahulu
kala untuk mendapatkan
sesuatu berita atau informasi
perlu menggunakan medium
seperti daun lontar, surat,
surat khabar dan lain-lain.
Tetapi kini, kemajuan
teknologi sangat pantas hanya
di hujung jari, sudah mampu
mendapatkan berita dan
informasi.

Secara tidak sedar juga
sebenarnya generasi masa kini
terdedah dengan pengaruh
sama ada positif atau negatif
melalui media sosial.

Jika bijak menggunakan
kemajuan-kemajuan yang
dibawa, banyak yang dapat
dimanfaatkan daripada
saluran-saluran media sosial
tersebut. Namun jika lalai,
minda generasi muda lebih
mudah dijajah oleh pengaruh



SEMANGAT muhibah penting dalam memupuk, menjaga perpaduan serta keharmonian antara rakyat
berbilang kaum.



**“Seharusnya setiap
tindakan perlu
seiring dengan
pemikiran yang
telah lama
merdeka dan maju.”**

negatif. Pengaruh negatif
ini jauh lebih berbahaya
berbanding pengaruh luar
yang nampak dan nyata pada
mata kasar.

Ini kerana, individu
tersebut perlu peka dengan
minda dan diri yang dijajah
secara senyap tanpa sedar.
Amat bahaya jika anak muda
mudah terikut budaya negatif
yang dilihat melalui media
sosial seperti mengambil
jalan pintas dan kurang bijak
dengan keluar dari rumah
ketika menghadapi sesuatu
masalah ataupun melakukan
perkara-perkara yang tidak
bermoral.

Semangat patriotik juga
kian dilihat semakin sepi,
tidak meriah seperti suatu
masa dahulu. Jika dahulu, kita
dapat melihat terlalu banyak

jalur gemilang dipasang dan
dikibar sejak awal bulan Ogos
lagi. Mata yang memandang
kibaran bendera-bendera
tersebut membawa perasaan
terharu, bangga dan hormat
terhadapnya.

Kita juga sering
beranggapan bahawa dengan
mengibarkan jalur gemilang,
sudah cukup untuk meraikan
dan menyemarakkan
hari kebangsaan. Namun
sebenarnya, menyambut
kemerdekaan bukan sekadar
dengan mengibarkan
bendera sahaja. Kibaran jalur
gemilang mestilah disertai
dengan semangat dan usaha
menjaga serta memelihara
kemakmuran negara tercinta.

Jalur gemilang yang dikibar
bukan sebagai melepaskan
syarat untuk menyambut
kemerdekaan. Acap kali
kita melihat jalur gemilang
yang lusuh, kotor, koyak
rabak masih digantung
dan dibiarkan berkibar baik
di premis perniagaan atau
bangunan. Bendera perlu
dipasang dengan sempurna
kerana ia merupakan simbol
penghormatan negara.

Kita juga perlu menghayati
serta menghormati maksud
di sebalik jalur gemilang yang
dikibarkan, meletakkan ia
di tempat yang baik bukan
dibiarkan jatuh di tanah,
dalam lopak air mahu
pun longkang. Hormati ia
sebaiknya umpama menjaga
kedaulatan negara.

Melalui semangat patriotik
yang ada dalam diri, ia
sebenarnya membantu
menzahirkan lagi rasa
cinta, sayang dan semangat
nasionalisme terhadap
tanah air. Seterusnya, sikap
mempertahankan tanah air
daripada dijajah anasir negatif
akan terus utuh.

Banyak cara dan langkah
yang boleh diambil untuk
menyemarakkan lagi
semangat patriotisme.

Generasi muda perlu
merebut peluang menyertai
semua aktiviti pada bulan
kebangsaan seperti perbarisan
dan aktiviti-aktiviti yang
mendorong kepada sifat
kebersamaan serta perpaduan
negara.

Antara usaha lain,
generasi muda juga boleh
membantu dan mengambil
peluang menyemarakkan
semangat patriotik dalam
media sosial. Bukan sahaja
ia memperkenalkan negara
dalam kalangan warganegara
malah ia turut membantu
memperkenalkan negara ke
seluruh dunia.

BERHATI-HATI DENGAN TINDAKAN

Bersesuaian dengan tema
hari kebangsaan pada tahun
ini *Malaysia Madani: Jiwa
Merdeka*, kita seharusnya
mencorakkan jiwa supaya ia
benar-benar merdeka. Usah
kita membiarkan diri dijajah
dengan sifat kolot jiwa dan

pemikiran.

Perbuatan dan pemikiran
terhadap sesuatu tindakan
merupakan bayang diri kita
yang sebenar. Setiap apa yang
kita muat naik, komen-komen
di media sosial yang ditaip
juga mencerminkan jiwa sama
ada bersifat matang atau pun
sebaliknya.

Budaya ‘menyerang’ di
media sosial berkenaan
sesuatu isu yang tular hanya
untuk memuaskan hati
sendiri amat tidak wajar
dijadikan sebagai budaya
kerana ia merupakan tindakan
yang negatif. Tindakan
tersebut sudah pasti memberi
pandangan yang tidak baik di
mata semua pihak, lebih-lebih
lagi jika ia melibatkan orang
luar.

Tindakan begitu
memperlihatkan kita seperti
kebudak-budakkan dan
tidak maju ke hadapan.
Adakah dengan tindakan
tersebut kita pasti jiwa sudah
betul merdeka? Tepuk dada
tanyalah minda.

Seharusnya setiap
tindakan perlu seiring dengan
pemikiran yang telah lama
merdeka dan maju.

Ayuh semua rakyat
Malaysia yang berjaya
merdeka, kita harus
terus menjaga semangat
muhibah sesama kaum
demi kemakmuran negara
tercinta. Semangat muhibah
ini penting dalam menjaga
kemakmuran negara, kerana
ia memupuk dan menjaga
perpaduan serta keharmonian
antara rakyat berbilang kaum.

Toleransi, saling
menghormati dan memahami
budaya serta kepercayaan
antara satu sama lain dapat
mengelakkan konflik serta
ketegangan yang boleh
menggugat keharmonian
negara.

Semangat muhibah yang
dipelihara tanpa mengira latar
belakang dan kepercayaan
juga mencipta kerjasama
dalam kemakmuran negara
seterusnya menyumbang
kepada kemajuan sektor
ekonomi, sosial dan politik.

Hanya dengan perpaduan
muhibah masyarakat
berbilang bangsa dapat
mencapai kemakmuran
negara.

Salam merdeka negaraku
Malaysia.

PENULIS ialah ialah Guru Bahasa di
Jabatan Bahasa Antarabangsa Pusat
Pengajian Bahasa, Universiti Tun
Hussein Onn Malaysia (UTHM).